

## Jordbruksøkonomien på Vestlandet i 2020 – utvikling og driftsresultat

### Hovudtendens

- Jordbruksinntekta til vestlandsbonden auka med 5,9 prosent
- Auke for mjølk, storfeslakt og gris, nedgang for sau og frukt og bær
- Best økonomi i frukt- og bærproduksjon trass i nedgang

Vestlandsbonden oppnådde ei jordbruksinntekt, målt som løn til alt arbeid og rente på egenkapital per årsverk, på kr 292 700 i 2020. Det er ein auke på kr 16 400 frå året før. I gjennomsnitt for landet auka jordbruksinntekta med kr 27 400 kr og vart på kr 327 500 per årsverk. Jordbruksarealet for vestlandsbruka var i middel 307 dekar, det same som i 2019.

Auken i jordbruksinntekta for Vestlandet skuldast auke i tilskot kombinert med moderat kostnadsutvikling. Nedgang i timebruk og renter påverka resultatet positivt.

Det var auke i jordbruksinntekta for dei fleste arealgruppene. Unnataket er bruka mellom 50 og 100 dekar der vi finn mange bruk med frukt og bær og bruk med sau. Dei største bruka over 500 dekar hadde størst auke frå eit svakt resultat i 2019. I denne gruppa er det mange store mjølkebruk.

**Mjølkeproduksjon** er viktig for landbruket på Vestlandet, og det er flest bruk i denne gruppa. Vederlag per årsverk (jordbruksinntekta) auka med 4,4 prosent eller kr 12 600 per årsverk. Mjølkebruka har auka grovfôrarealet med 3 dekar, medan grovfôravlinga gjekk ned med 24 FEm per daa. Tal årskyr, mjølkevot og liter omsett mjølk auka med om lag 3 prosent. Ein nedgang i mjølkeprisen på 26 øre/liter reduserte mjølkeinntektene trass auka volum. Kjøtpriisen auka med kr 1,06 per kg for kukjøtt og kr 1,69 for anna storfekjøtt. Prisauke og auka kjøtmengde var med på å auke husdyrinntektene med 1,8 prosent. Arbeidsinnsatsen i 2020 auka med 1,4 prosent frå året før.

Det var en liten auke i variable kostnader på 4,1 prosent i hovudsak høgare kostnader til kraftfôr grunna pris- og volumauke. Faste kostnader var omlag uendra frå 2019. Kostnader til leigd arbeid auka med nesten 30 prosent trass i at timar leigd arbeid auka med berre 7,7 prosent. Det tyder på auke i timepris. Nedgang i utgifter til elektrisitet på 24,3 prosent i forhold til 2019 heldt samla faste kostnader på omlag same nivå som året før. Driftsoverskotet i jordbruket auka med 3,1 prosent.

Det har vore investert mykje på mjølkebruka dei siste åra. Nettoinvesteringa i 2020 var kr 337 600 per bruk. Trass gjeldsauke på nesten 20 prosent, var renteutgifter nesten uendra. Lågt rentenivå i kjølvatnet av pandemien bidrog positivt til resultatet.

Produksjonsomfanget på mjølkeproduksjonsbruka var på 29,3 årskyr, ein auke på 0,9 årskyr frå 2019. Bruka omsette i gjennomsnitt 217 700 liter mjølk og 7 060 kg storfekjøtt (inkl. kukjøtt). Gjennomsnittleg jordbruksareal var 400 dekar, ein auke på 1 dekar. Arbeidsinnsatsen var litt over 2,1 årsverk à 1 845 timar. Arbeidsinnsatsen i 2020 auka med 1,4 prosent frå året før.

**Bruka med kombinert mjølkeproduksjon og sauehald** oppnådde i 2020 ei jordbruksinntekt per årsverk som var kr 326 100, ein auke på 10,3 prosent frå 2019.

Arealet gjekk ned med 4 daa, medan grovfôravlinga auka med 14,7 prosent. Det var generell auke i produksjonen, tal årskyr og tal vinterfôra sau auka med høvesvis 2,8 og 1,3. Omsett mjølk var 137 300 liter ein auke på 23,8 prosent. Mjølkeprisen gjekk ned med 20 øre per liter eller 3,9 prosent. Volumauke medførte likevel auka mjølkeinntekt med 19 prosent. I 2020 var det stor auke i sauekjøttpris med kr 3,76 per kg til kr 11,41, medan prisen på lammekjøtt og

**Utfyllande informasjon til pressemelding 6.12.2021:  
Jordbruket på Vestlandet i 2020**

storfekjøtt var nærmast uendra. Husdyrinntekter auka til saman med kr 140 500 eller 15,2 prosent.

Det var auke i variable kostnader på 12,5 prosent eller kr 72 000. Kraftfôrkostnadene auka mest, men det var også stor auke i kostnader til kjøp av dyr og veterinærkostnader. Faste kostnader auka med 6,1 prosent eller kr 30 400. Mesteparten av det skuldast auka vedlikehald av maskiner og reiskap og driftsbygningar.

Auke i inntekter grunna volumauke og moderat auke i kostnader medførte høgare driftsoverskot (7,6 prosent). Kombinert med lågare timebruk og lågare rente auka jordbruksinntekta med 10,3 prosent.

Gjennomsnittleg jordbruksareal var 374 dekar. Bruka hadde 18,8 årskyr og 83 vinterfôra sauer. Arbeidsinnsatsen gjekk ned med 110 timar og var på 2,0 årsverk à 1845 timar per bruk.

**Bruka med kombinert mjølkeproduksjon og svinehald** hadde eit svakt resultat i 2019. I 2020 auka jordbruksinntekta med 48,1 prosent eller kr 96 600 til kr 297 400. Svinekjøttproduksjonen auka med 3 prosent til 26,4 tonn og mengde storfekjøtt auka med 40 prosent til 4,7 tonn. Talet på selde smågrisar gjekk ned med 17 prosent. Omsett mjølk auka med 23,8 prosent til 194 700 liter.

Prisen på mjølk minka med 37 øre per liter, medan prisen på storfekjøtt var om lag uendra. Prisen på svinekjøtt auka med kr 2,26 per kg og smågrisprisen auka med kr 106. Totalt auka inntektene frå husdyrprodukt med 14,3 prosent på desse bruka. Tilskot og andre inntekter auka med 14,3 prosent, slik at produksjonsinntektene i alt gjekk opp med 13,3 prosent frå 2019. Variable kostnader auka med 13 prosent, medan det var eit fall i faste kostnader på 2 prosent.

Det var negativ nettoinvestering i denne gruppa i 2020 noko som tyder på nedsliting av driftsapparatet. Gjelda auka med 4,6 prosent. Arbeidsinnsatsen auka med 3,7 prosent til 2,0 årsverk. Bruka hadde eit produksjonsomfang på 281 dekar, 23,3 årskyr, 13 purker, 492 smågriser for sal og 26 400 kg kjøtt frå slaktegris. Det er berre seks bruk i denne gruppa, og endringar på enkeltbruk kan ha store utslag på resultatata.

**Sauebruca** på Vestlandet hadde eit svært lågt resultat i 2020. Jordbruksinntekta gjekk ned med kr 22 000 per årsverk til kr 116 700. Tal vinterfôra sauer auka med 2 til 144, medan omsett kjøtt gjekk opp med 6 prosent. I gjennomsnitt gjekk prisen på lammekjøtt opp med kr 0,96 per kg og prisen på sauekjøtt auka med kr 3,87. Husdyrinntektene auka med 12,3 prosent medan samla tilskot auka med 2 prosent. Totalt gjekk produksjonsinntektene opp 3,3 prosent. Variable kostnader auka med 17 prosent, medan faste kostnader auka med 5,2 prosent. Arbeidsforbruket auka med 2,2 prosent og utgjorde 1,3 årsverk. Sjølv om gjelda minka med 8,3 prosent, og renteutgiftene med 14,5 prosent, minka jordbruksinntekta med kr 22 000 per årsverk.

I 2019 omfatta driftsforma 32 bruk med i gjennomsnitt 144 vinterfôra sauer og 237 dekar jordbruksareal.

**Produksjon av storfekjøtt**, enten med ammekyr eller på innkjøpte kalvar, oppnådde ei jordbruksinntekt per årsverk på kr 143 800 i 2020, ein auke på kr 67 400 per årsverk frå eit svært lågt nivå i 2019. Det har vore store endringar i jordbruksinntekta frå år til år for desse bruca. Det vert stadig fleire bruk med denne driftsforma, men det er likevel få bruk i gruppa, og nye bruk eller endringar på enkeltbruk, kan gje store utslag for gruppa.

Det vart produsert 10 600 kg storfekjøtt på desse bruca i 2020, 1 600 kg mindre enn i 2019. Prisen på storfekjøtt auka med om lag 3,50 per kg, og totalt gjekk inntektene frå husdyrhaldet opp med 7,1 prosent. Det vart selt fleire livdyr frå desse bruca samanlikna med tidlegare år. Tilskota auka med 10,8 prosent, og totalt auka produksjonsinntektene med 7,5 prosent. Det var lite endring i faste og variable kostnader frå året før. Arbeidsforbruket minka med 86 timar til 1,2 årsverk, noko som påverka resultatet positivt. Høgt investeringsnivå på kr 317 500 per bruk svekka det økonomiske resultatet grunna auka avskrivning og renter. Gjelda auka med 16

**Utfyllande informasjon til pressemelding 6.12.2021:  
Jordbruket på Vestlandet i 2020**

prosent og renteutgiftene med 8 prosent samanlikna med 2019. God kostnadskontroll styrka resultatet for 2020.

Det var 13 bruk i gruppa i 2020. I gjennomsnitt hadde dei 339 dekar jordbruksareal, 20 ammekyr, 21 kviger og 24 slakta oksar.

**Frukt- og bærproduksjon** er den driftsforma som har hatt størst variasjon i jordbruksinntekta mellom år. 2020 vart eit svakt frukt- og bærår samanlikna med dei to føregåande åra. Jordbruksinntekta gjekk ned med 11,4 prosent frå 2019 til 2020, og vart kr 332 000 per årsverk. Frukt- og bærproduksjon vart likevel den driftsforma som oppnådde høgast jordbruksinntekt på Vestlandet også dette året. Det var middels avling av eple medan det var full avlingssvikt på plommer. Det var auke på pærer og morellar. Prisane på frukt til produsent var høgare for alle kulturane. For bringebær var det litt lågare avling enn i 2020. Frukt- og bærinntektene fall med 26 prosent. Dei variable kostnadene fall med 2 prosent og dei faste med 15 prosent. Det var særleg kostnader til leigd arbeid som gjekk ned. Arbeidsforbruket minka med 14 prosent. Arbeidsinnsatsen var på 1,9 årsverk per bruk. Det er 19 produsentar i denne gruppa, og i gjennomsnitt hadde dei eit frukt- og bærareal på 49 dekar.

**Nettoinvesteringane** på vestlandsbruka låg høgare enn landsgjennomsnittet også i 2020. I gjennomsnitt investerte vestlandsbøndene for kr 194 800, medan nettoinvesteringane for landet var på kr 161 400. Nettoinvesteringane på Vestlandet minka med kr 20 200 frå året før. Det er dei største bruka som investerer, og det er særleg innan mjølkeproduksjon det vert investert. Samla gjeld auka med 9 prosent for vestlandsbonden, og var uendra på 3,3 mill. kr i middel per bruk. Rentekostnadene gjekk ned med 10 prosent.

**Driftsgranskingane viser at driftsoverskotet frå jordbruket på Vestlandet** utgjorde 39 prosent av dei samla inntektene til familien i 2020, det same som i 2019. Lønsinntekt utgjorde 42 prosent. Skogbruk og tilleggsnæring med utgangspunkt i ressursane på bruket utgjorde høvesvis 1 prosent og 7 prosent. Resten av dei samla inntektene er anna næring, pensjonar, sjukeløn og kapitalinntekter.

**Maksimalt jordbruksfrådrag** var auka frå kr 166 400 til kr 190 400 i 2020. Tek ein omsyn til inntektsverknad av jordbruksfrådraget, vert den skattekorrigerte jordbruksinntekta i 2020 kr 324 000 i gjennomsnitt per årsverk for bruka frå Vestlandet. I alt utgjer inntektsverknaden av jordbruksfrådraget kr 31 300 per årsverk, ein auke på 2 800. Det er ikkje teke omsyn til inntektsverknaden av jordbruksfrådraget i dei andre resultatmåla som er presenterte frå driftsgranskingane.

**Jordbruksinntekt** er definert som løn til alt arbeid og rente på eigenkapitalen per årsverk, og varierer mellom ulike produksjonar og storleik på bruka.

**Skattefordel** for bønder er skattelette i form av eit ekstra jordbruksfrådrag i allmenn inntekt. Det blir rekna ein inntektsverknad av skatteletten tilsvarende den inntekta ein må ha for å oppnå same kjøpekraft som skatteletten genererer.

**Driftsgranskingane i jordbruket** var for 2020 basert på eit tilfeldig og representativt utval av 924 bruk over heile landet. I alt omfattar granskinga 187 bruk frå Vestlandet; 59 i Hordaland, 67 i Sogn og Fjordane og 61 i Møre og Romsdal. Alle dei presenterte resultatane er middeltal frå grupper av bruk. Det er stor spreiding i materialet, noko som ikkje kjem fram her. Middeltala for dei 187 bruka gjev likevel ein god peikepinn på korleis den økonomiske utviklinga for jordbruket på Vestlandet har vore.

**For fleire opplysningar, kontakt NIBIO Bergen ved:**

Seniorrådgjevar Torbjørn Haukås, 476 58552,

eller rådgjevar Marius Berger, 941 49336

E-post: [bergen@nibio.no](mailto:bergen@nibio.no)

Internett: [www.nibio.no](http://www.nibio.no)

---

**Utfyllende informasjon til pressemelding 6.12.2021:  
Jordbruket på Vestlandet i 2020**

Samla oversikt for 2020

|                         | Tal bruk | Gj.areal dekar | Driftsoverskot per bruk |         | Vederlag til arbeid og egenkapital per årsverk |         | Skattekorrigert vederlag per årsverk |         |
|-------------------------|----------|----------------|-------------------------|---------|--|---------|--------------------------------------|---------|
|                         |          |                | 2019                    | 2020    | 2019   | 2020    | 2019                                 | 2020    |
| Vestlandet, alle        | 187      | 307            | 427 700                 | 445 300 | 276 300  | 292 700 | 304 800                              | 324 100 |
| Bruk < 50 dekar         | 10       | 33             | 350 000                 | 397 000 | 323 400  | 345 200 | 353 600                              | 380 800 |
| « 50 - 100 dekar        | 15       | 73             | 429 400                 | 336 500 | 332 200  | 302 600 | 352 100                              | 331 700 |
| « 100-200 dekar         | 38       | 157            | 299 200                 | 338 500 | 260 500  | 286 400 | 300 500                              | 322 000 |
| « 200-300 dekar         | 43       | 242            | 355 900                 | 357 800 | 246 100  | 257 500 | 272 300                              | 288 300 |
| « 300-500 dekar         | 53       | 372            | 464 600                 | 471 500 | 275 600  | 292 600 | 305 100                              | 324 300 |
| > 500 daa               | 28       | 711            | 658 100                 | 750 600 | 279 300  | 310 000 | 304 100                              | 338 700 |
| Mjølkeproduksjon        | 76       | 400            | 510 200                 | 525 800 | 285 300  | 297 700 | 316 800                              | 329 600 |
| Mjølksauhold            | 16       | 374            | 519 500                 | 559 100 | 295 700  | 326 100 | 321 500                              | 355 800 |
| Mjølksvinehold          | 6        | 281            | 342 000                 | 543 700 | 200 900  | 297 400 | 226 100                              | 323 700 |
| Kjøttproduksjon, storfe | 13       | 339            | 75 400                  | 151 900 | 76 500   | 143 800 | 98 800                               | 171 800 |
| Sauhold                 | 32       | 237            | 153 500                 | 128 800 | 138 700  | 116 700 | 168 100                              | 144 300 |
| Frukt og bær            | 19       | 59             | 551 700                 | 402 500 | 383 600  | 332 000 | 408 600                              | 367 900 |
| Vestland fylke          | 126      | 267            | 403 600                 | 424 900 | 271 600  | 286 000 | 301 200                              | 317 000 |
| Møre og Romsdal fylke   | 61       | 389            | 479 200                 | 487 400 | 250 800  | 280 300 | 309 900                              | 335 500 |

Alle beløpa i tabellen er oppgjevne i nominelle kroner.

Jordbruksinntekt per årsverk er definert som løn til alt arbeid og til rente på egenkapitalen

Jordbruksinntekt per årsverk à 1845 timar for Vestlandet og landet i perioden 2011-2020

